

## ZAKON O KLASIFIKACIJI DJELATNOSTI U BOSNI I HERCEGOVINI

(„Službeni glasnik BiH“, broj: 76/06, 100/08 i 32/10)<sup>1 2</sup>

### DIO PRVI - OSNOVNE ODREDBE

#### Član 1.

##### (Predmet Zakona)

Ovim Zakonom utvrđuje se pojam klasifikacije djelatnosti u Bosni i Hercegovini (u daljnjem tekstu: KDBiH), značaj i cilj zakona, primjena zakona i donošenje Odluke o klasifikaciji djelatnosti u Bosni i Hercegovini (u daljnjem tekstu: Odluka).

#### Član 2.

##### (Definicija KDBiH)

KDBiH je obavezan stan dard koji se upotrebljava pri evidentiranju, prikupljanju, obradi, analiziranju, publiciranju i iskazivanju podataka po djelatnostima značajnim za praćenje stanja i kretanja na ekonomskom, demografskom i socijalnom području u Bosni i Hercegovini.

### DIO DRUGI - OPĆE ODREDBE I DONOŠENJE ODLUKEO KDBiH

#### POGLAVLJE I. OPĆE ODREDBE

#### Član 3.

##### (Primjena KDBiH)

KDBiH se primjenjuje:

- a) u praćenju promjena u ekonomiji i za donošenje mjera ekonomske i socijalne politike;
- b) u službenoj statistici, sistemu informiranja, evidenciji i planiranju razvoja;
- c) u prikupljanju, obradi i objavljivanju podataka prema djelatnostima;
- d) u sklapanju ugovora i izvršavanju međunarodnih obaveza;
- e) u naučnoistraživačkom i analitičkom radu;
- f) za upis djelatnosti u statističke, administrativne i registre posebnih namjena.

#### Član 4.

##### (Osnov za donošenje)

KDBiH kao statistički stan dard utvrđuje se u skladu sa Zakonom o statistici Bosne i Hercegovine ("Službeni glasnik BiH", br. 26/04 i 42/04).

#### Član 5.

##### (Osnov KDBiH)

(1) *KDBiH se zasniva na Statističkoj nomenklaturi ekonomskih aktivnosti Evropske unije NACE i uporediva je s međunarodnom klasifikacijom djelatnosti Ujedinjenih naroda (ISIC).*

---

<sup>1</sup> Legalist.ba objavljuje ovaj tekst u dobroj vjeri, smatrajući ga u trenutku objavljivanja ispravnom prečišćenom verzijom zakonskog teksta. Ali, autori i Legalist.ba ne jamče da je objavljena verzija prečišćenog teksta propisa pravno valjana, trenutno važeća ili pravodobno dopunjena i mijenjana, stoga Legalist.ba ne odgovara za štetne posljedice koje mogu nastupiti usljed preuzimanja i korištenja ovog neslužbenog prečišćenog teksta.

<sup>2</sup> Tekst koji je *italic* su izmjene i dopune objavljene u „Službenom glasniku BiH“ broj: 100/08, dok su izmjene i dopune koje su objavljene u „Službenom glasniku BiH“ broj: 32/10 podvučeni tekst.

(2) KDBiH se mora stalno usklađivati sa svim zvaničnim promjenama Statističke nomenklature ekonomskih aktivnosti Evropske unije, a time i s međunarodnom klasifikacijom djelatnosti Ujedinjenih naroda.

## **POGLAVLJE II. DONOŠENJE ODLUKE O KDBiH**

### **Član 6.**

#### **(Donošenje i sastavni dio Odluke KDBiH)**

(1) Odluku o KDBiH donosi Agencija za statistiku Bosne i Hercegovine (u daljnjem tekstu: Agencija).

(2) Sastavni dio Odluke iz stava (1) ovog člana čine:

- a) Klasifikacija djelatnosti Bosne i Hercegovine,
- b) Klasifikacija djelatnosti Bosne i Hercegovine s objašnjenjima.

(3) Agencija donosi Odluku iz stava (1) ovog člana u saradnji s Federalnim zavodom za statistiku i Zavodom za statistiku Republike Srpske (u daljnjem tekstu: entitetski zavodi).

(4) Usklađivanje KDBiH s međunarodnim standardima iz člana 5. stav (2) ovog Zakona obavlja Agencija u saradnji s entitetskim zavodima donošenjem Odluke o reviziji KDBiH ili Odluke o novoj KDBiH, zavisno od obima promjena.

### **Član 7.**

#### **(Usaglašavanje KDBiH)**

(1) Entiteti i Brčko Distrikt Bosne i Hercegovine (u daljnjem tekstu: Brčko Distrikt) mogu predlagati razradu klasifikacije djelatnosti na dodatne nivoe koji nisu određeni Odlukom o KDBiH iz člana 6. ovog zakona.

(2) Razrada klasifikacije djelatnosti iz stava (1) ovog člana može se vršiti jedanput godišnje.

(3) Prijedlozi razrade moraju se dostaviti Agenciji do 1. septembra tekuće godine.

(4) Agencija, entitetski zavodi i Brčko Distrikt dužni su usaglasiti prijedloge razrade na dodatne nivoe iz stava (1) ovog člana.

(5) Usaglašeni prijedlog razrade iz stava (1) ovog člana Agencija donosi do 1. decembra tekuće godine.

## **DIO TREĆI - PRIMJENA KDBiH I STATISTIČKI REGISTRI**

### **POGLAVLJE I. PRIMJENA KDBiH**

#### **Član 8.**

##### **(Upotreba KDBiH)**

KDBiH se upotrebljava za određivanje djelatnosti, odnosno za sva razvrstavanja po djelatnostima poslovnih i drugih subjekata i njihovih dijelova za potrebe statistike, različitih službenih i drugih administrativnih zbirki podataka (evidencije, registri, baze podataka i sl.).

#### **Član 9.**

##### **(Hijerarhijske kategorije KDBiH)**

*(1) Hijerarhijske kategorije grupiranja KDBiH privrednih i drugih subjekata određuje Agencija u saradnji s entitetskim zavodima za statistiku Odlukom o KDBiH iz člana 6. ovog zakona.*

*(2) Hijerarhijske kategorije grupiranja KDBiH iz stava (1) ovog člana moraju biti usklađene sa uslovima iz člana 5. ovog zakona.*

#### **Član 10.**

##### **(Razvrstavanje pravnih i fizičkih lica)**

Prema KDBiH razvrstavaju se po djelatnostima:

- a) pravna i fizička lica koja obavljaju djelatnost u skladu sa zakonskim propisima,
- b) organi vlasti i uprave na nivou države,
- c) organi vlasti i uprave na nivou entiteta i Brčko Distrikta,
- d) organi vlasti i uprave na nivou kantona u Federaciji Bosne i Hercegovine,
- e) organi vlasti i uprave jedinica lokalne samouprave u Bosni i Hercegovini.

#### **Član 11.**

##### **(Nadležni organi za razvrstavanje subjekata po djelatnostima)**

Razvrstavanje po djelatnostima subjekata iz člana 10. ovog Zakona, u skladu s KDBiH, obavljaju nadležni organi Bosne i Hercegovine, entiteta i Brčko Distrikta, u skladu sa zakonima i drugim propisima Bosne i Hercegovine, entiteta i Brčko Distrikta.

#### **Član 12.**

##### **(Nivoi razvrstavanja i razvrstavanje prema pretežnoj djelatnosti)**

(1) Subjekti iz člana 10. ovog zakona i njihovi dijelovi razvrstavaju se u hijerarhijske kategorije KDBiH u skladu s Odlukom o KDBiH iz člana 6. ovog zakona, prema djelatnosti koju obavljaju.

(2) Ako poslovni subjekti iz stava (1) ovog člana obavljaju više djelatnosti, razvrstavaju se prema djelatnosti koju pretežno obavljaju.

### **POGLAVLJE II. STATISTIČKI REGISTRI**

#### **Član 13.**

##### **(Nadležni organi za vođenje statističkih registara)**

(1) Nadležni statistički organi na nivou Bosne i Hercegovine, entiteta i Brčko Distrikta vode statističke registre subjekata iz člana 10. ovog Zakona u skladu sa KD BiH.

(2) Sadržaj, oblik i način vođenja registra iz stava (1) ovog člana se određuje u skladu sa međunarodnim standardima i standardima Evropske unije.

### **DIO ČETVRTI - PRIJELAZNE I ZAVRŠNE ODREDBE**

#### **Član 14.**

##### **(Usklađivanje zakona)**

Entitetski zakoni i zakon Brčko Distrikta, kojima se uređuje klasifikacija djelatnosti, uskladit će se s ovim Zakonom u roku od 90 dana nakon njegovog stupanja na snagu.

#### **Član 15.**

##### **(Donošenje podzakonskih propisa)**

Entiteti i Brčko Distrikt donijet će podzakonske akte o razvrstavanju subjekata iz člana 10. ovog Zakona, u skladu sa ovim Zakonom i Metodologijom za statističku primjenu KDBiH, u roku od 120 dana od dana početka primjene ovog Zakona.

#### **Član 16.**

##### **(Prijelazni period za primjenu važećih propisa)**

U prijelaznom periodu, do usaglašavanja zakona iz člana 14. ovog Zakona, za statističke i analitičke potrebe primjenjivat će se do sada važeći propisi koji uređuju klasifikaciju djelatnosti.

#### **Član 17.**

##### **(Stupanje na snagu)**

Ovaj Zakon stupa na snagu osmog dana od dana objavljivanja u "Službenom glasniku BiH".

Zakonom o izmjenama i dopunama Zakona o klasifikaciji djelatnosti u Bosni i Hercegovini (Službeni glasnik BiH broj: 32/10) dodani su novi članovi:

**Član 4.**

(1) Entitetski zakoni i zakon Brčko Distrikta, kojima se uređuje klasifikacija djelatnosti, uskladit će se s ovim zakonom u roku od 90 dana od dana njegovog stupanja na snagu.

(2) Entiteti i Brčko Distrikt donijet će podzakonske akte o razvrstavanju subjekata iz člana 10. ovog zakona, u skladu s ovim zakonom i Odlukom o KDBiH iz člana 6. ovog zakona, u roku od 120 dana od dana početka primjene ovog zakona.

**Član 5.**

Ovaj zakon stupa na snagu osmog dana od dana objavljivanja u "Službenom glasniku BiH".